

少傳野亭劉公遺藁

小傅野亭劉公 彙卷之三

記序

陳留縣重修孔子廟學記

陳留廟學在邑治東少偏位址素下加以霖潦且歲久  
弗葺凡春秋有事每籍藁以行妥靈布虔於禮雅弗稱  
蒲郡張侯試宰謁廟之初志於作新而未卽舉事適憲  
副廣陽車公考學政臨其土諗侯之才遂以成事委焉  
旣而大叅華容王公憲副郴陽鄧公因行縣至皆樂於

相成忠時以先卦君憂家居亦偕與謀乃具書質請於  
巡撫盱眙陳公議旣協卜日遂舉事焉中建大成殿七  
間東西廡三十間廡之前爲戟門五間左神庫右神厨  
各五間庫厨之前爲櫺星門櫺星之左建門房三門中  
闢廣道以便出入殿之後爲明倫堂堂左右翼以兩齋  
齋之東少南建號四連總二十四間外繚以垣建置四  
門以孝弟忠信四字分扁其額堂之後有隙地仍斬艾  
荒穢建會饌堂五間器物之需百凡咸具外至射亭官

解廬儲牆屏之所一皆撤敞就新易卑以闕於是享獻  
有宮生徒有居講肄有所游息有方神位有赫丹雘有  
焜宮廟規制之盛實甲他邑過者無不衽輶興瞻竦焉  
是役也財用凡若干不費于官不取于民皆藉助於邑  
之士夫衆庶尚義者之力助成者藩臬諸公咸與而廣  
陽肇容二公十六七輩事者丞簿葉君全王君道蕭君  
成典史張君興學諭祝君弘藩司訓宗君庭蕙董君鑑  
孔君倫亦皆有功而侯獨力任厥成工始於弘治十年

七月六日落成于十二年正月四日舍菜既成侯乃以紀事之筆謬授于忠竊惟吾孔子之聖配天地賢堯舜其道德高厚在當時雖及門高弟猶未能窺其宗廟百官之盛忠何人敢謂知乎然道德之餘功詩書之遺澤使天常不殄人極不隳華夷不紊理欲不雜足以覆育生人而不泯于後世者豈惟忠知之凡有血氣者皆知之又皆知所以尊之崇之思竭其力以報之故孔子雖沒凡今有民土者欲安其主必崇宮焉欲食其功必豐

祀焉欲歆其靈必齋潔焉是豈徼福爲哉蓋仰承

國家興學需才之意固焉是在而所以尊聖哲報功德之  
念於茲誠未能忘而或者以爲孔子在當時忘黎藿之  
餒躬轍環之勞以卒老于途其志蓋欲道行於天下澤  
被于生人也今雖沒其在天之靈眷念于天下後世者  
惓惓焉千萬載猶一日誠使爲其徒者仰思道德之隆  
聿求其志於百世之上頌六經之言不徒爲言語文字  
之資取青拾紫之媒必明諸心踐諸身見諸德業在家

庭爲孝子在 朝廷爲忠臣在州里爲良士在天下後  
世爲名人絕細小凡近之習趨聖賢高明之地使其志  
鬱而未信其道尼而未行者於今日焉信之行之其所  
謂尊誠莫有大於此者苟徒尊而不知尊其道尊其道  
又不知所以行視其格言遺訓殆同弁髦是蓋以僞不  
以誠以名不以實宮雖崇未能安其主視當時轍環之  
勞猶是也祀雖豐齋雖誠未能歆其靈視當時藜藿之  
餒猶是也所謂學舍雖具亦不過爲師儒一逆旅耳於

孔子奚有哉於

國家興學需才之意奚補哉而凡絃誦游歌于是者其職固如是哉忠鄉人也相愛相規於誼有關故因紀事之餘敢申是以致瀆告

永思堂記

誠其罔不達乎金石可開丘陵可叱鬼神可動豚魚可乎況人乎哉至親之間乎哉而至親之間乃有若吳越生不知死不戚蓋亦不加之意焉耳意不加則誠不至



則氣不屬則生不知死不戚亦其宜耳昔魯母啣指而  
心動婁父搆疾而汗流朱壽昌之於同州丁鶴年之於  
武昌來章之神翁杜羔之老婦考於古驗於今以是知  
誠之所感信矣若黎君鑑之事其亦類乎往者廣東之  
亂夷獠四劫所至一空其未至者輒相恐曰賊至矣老  
幼扶持奔突君時方七歲同行者數欲棄之其母曰寧  
相守而死無相棄而生已而賊至竟相失各不知所往  
咸化丙戌君被選入

內廷給事

今上於青宮日被恩寵而獨不知其父母所在虔誠精禱  
貌毀心哀久之有至自高州頗能道其鄉故事君去鄉  
時雖甚幼尚能記憶其家有曰黃江村者試問之則其  
村人也已而物色其里閭族出親戚無一弗合者乃知  
其父已卒母劉孀居固無恙驚喜且泣具舩遣使迎養  
京師時母子不相知者二十有二年矣於乎誠其罔不  
達乎君之事與壽昌豈異也久之劉以壽終殖安定門

之五里原

今上卽位君屢有厩馬蟒衣玉帶之賜而惟以不得事其  
父母爲恨曰昔子路負米而喜列鼎而悲其以是乎作  
堂曰永思昔予直書館間爲予言而求記夫當平世父  
子兄弟懽然相保未知其樂也而黨兵亂間關流離萬  
死一生睽而復合天地神明其有相之者則最不幸之  
中而有至幸者存其喜當何如而君尤以抱永慕之思  
亦可以爲孝乎故予爲之記

野亭拙隱記

昔宋韓待制年六十三致仕歐陽公作詩贈之嘉其有  
勇退之節予於二十年前嘗見公詩遂自許致仕之期  
當與韓同乃和詩一章併識數語書于冊將以爲異時  
乞老之券旋走人故鄉城南三里許上一隱墅而豫爲  
之計焉旣而奔走南北無暇論筆僕輩恐亦有主人到  
老不曾歸之計遂視若棄物荒蕪不除予每聞而惜之  
正德庚午予承

命南京吏部未幾被

召入典制誥又未幾

命入內閣參與機政甫半載予以老病乞休疏凡十餘上  
乃蒙

恩予告得歸時予年六十也蓋歸之期雖先韓三年然亦  
不害其爲信耳既閱歲予疾少已乃卽舊墅修築之中  
原建一堂扁曰野趣今易爲野堂堂之後建一小亭亭  
之後建一小閣亭之左鑿一泉亭之右植一籬堂之前

雜土木石築一小山泉左數步許又別開一圃瓜隴芋  
圃杞畦菊徑諸凡野色多見采錄至於衆所共由之路  
則高土爲垣栽木爲戶覆瓦甃於上總題曰野亭拙隱  
蓋平生於華野加之性又踈野故此類不得不隨之野  
也工訖予偕數客往落之客有笑而謂吾者曰公之言  
幾迂矣且泉可以滋萬物山可以出雷雨堂宇圃籬可  
以託居處毓蔬果是皆有功於人有濟於用有資於世  
者也而公繫以野名之夫所謂野者乃鄙朴無文無補

於世之謂今茲數者咸亦有用而被是稱焉無乃枉其材屈其用而辱其名乎予方將對客而未知所謂乃拾級升閣顧睨山泉類若欲揖之進而探其意於是聞泉之聲泱泱然籬圃卉木槭槭然山亭堂閣亦皆環拱趨向者欲以意告予者以爲天生萬物未嘗無用今某等形器雖微亦萬物中一物也夫豈塊然而無所資於世哉但用雖無窮而分量則有限材質雖具而所遇有不司向使託得其地而所植以時泉或可以波潤乎九土

山或可以鎮定乎夷夏圃離堂宇或可以成廟廊棟幹  
之材廣寒士萬間之庇今拘於所遇而皆弗能焉是亦  
時也分也然幸而託迹阿衡之鄉假成主人之手使公  
於是朝而遊焉夕而處焉暇則舉壺觴携賓從而登眺  
焉於是文人韻士重客名流或形諸大篇之春融或託  
諸短章之寂寞金石鏗鏘珠玉璀璨是某等雖未遇於  
光明烜赫之地而獨見於縉紳清議之口雖見枉於一  
隅一方之小而無愧於天地萬物之情若是亦榮矣幸



矣將自慶之不暇矣客何人斯而謂我爲辱哉而謂我  
爲辱哉予聞其言方將舉以復客客醉臥呼之不應乃  
自歌曰我山嶷嶷今我泉泱泱我堂翼翼今我亭格格  
圃籬塍塢今被以野色中有一人兮野而且拙居朝則  
愚兮謀野則獲于時處處兮於焉嘉客野雲林月兮主  
賓醉酒耽吟兮生業浩歌一聲兮激雲野酌數巡兮耳  
孰方是時不知天何謂之高地何謂之厚而野亭拙隱  
又何謂之窄歌未闕僕夫告曰日暮予起而視見蒼煙

被野白露載途乃促輿而歸歸之明日遂述始末記之  
閣楣以識歲月

恭題 誥勅碑陰記

臣忠既衰老妄効趙臺卿為壽藏一區自為墓誌一首  
剗石藏諸家預誠子孫他日毋豐蔀毋希

恩澤毋干名筆為銘誄歌輓蓋以臣才素庸下在位且未  
久無功德於民無勞勩于

國無慰釋於士夫之望故凡 恤典所有者不敢纖毫覲

覲於其間也既而又自思曰 誥與勅乃

先朝列聖所寵錫而愚臣得於蒙被之久者于是不表章之其何以揚天休昭

上德而示后裔乃恭勒諸樂石樹之墓道覆以亭宇而扁鐫護視日惟勤盖此乃

列聖憫臣之不及而曲垂褒獎以揜其過以誘之進不敢以無能不任而擅於隱蔽也又將俾後之人登臣之寵恭覲 奎章知

上之所以眷愛臣下者若天之廣地之厚不以輪困擁腫之株而靳雨露栽培之德又將察臣之心矜臣之志謂其亦能以曠官廢祿為懼而不敢貪

天之寵以為其私榮又將俾臣子孫世篤報稱克謹修懇懇焉服道德樹勲名閔閔以謝臣既往之僇則九泉幽魄雖不可作而百年生氣庶幾乎不隕落於荒煙野草之間矣碑成敬書于後以識歲月

# 陶山記

正德辛未予以老病乞骸歸至是十有三載矣有池亭  
魚鳥之娛風月嘯歌之樂賓客游從之美蔬果魚肉之  
奉瓜瓠杞菊之區凡養生娛老之具在他人或歎然而  
迂拙粗淺之福享之已逾涯分矣今嘉靖癸未夏予臥  
病三月不能出門戶兒輩乃令陶人製假山一區置座  
隅將以速野趣延詩思以豁病懷予見其中峰崒岬有  
泰山玉屋之勢猶周天子君臨鎬京賴先王德澤為根  
柢而天日之尊千萬載猶一日邊外二中峰勢少張其

氣昂昂然其傲抗抗然猶秦楚強伯有崛起問鼎之意  
但顧畏名義不敢越姑竊尊尊之誼以假名於天下中  
峰下二小峰猶邾莒小邦低眉低首欲上附天王而不  
能下摧強伯而不敢患烈感慨之氣頽然於顏面予因  
撫視而嘆曰有是哉陶人之能也覺削土范而指示名  
教於心目所會之地彼晚唐藩鎮之抗傲庭實莽卓操  
弄之拔扈不臣林甫之嫉能誤國似道之罔上要君使  
當時見之當死心灰面甘為九泉沉錮之鬼噫嘻為造

化司陶者胡爲乎乃埏埴是輩於世耶文成子孫存恩  
乃進而告曰茲山匪直有君臣之倫然家庭間父子之  
尊卑翁孫之俯仰僮僕之奔走鄉邦之長長幼幼天地  
之禮序樂和具王章悉家範括鄉訓而天下衆理悉是  
焉在矧吾祖又表章以增其光則吾父暨存恩當朝夕  
愛護鑒視而奉教者塾師矣存恩稚齒也有足以起予  
者因述爲陶山記

送都憲周先生巡撫甘肅序

頃者朝廷將有事西陲議者以甘肅巡撫者事其地  
久請易處之

上既俞其請遂擢吾省方伯周公瑞為都察院右副都  
御史以往方伯王公暨諸寮友走使授簡于忠俾一言  
為贈予惟今之都御史在漢即御史大夫其秩與太尉  
並列為三公官尊地嚴非他卿大夫可擬甘肅遠在  
國西隅最爾一區茲釋內臺之嚴假節鉞之重以遠適其  
土豈不以鎖鑰要地誠得人以司之所以尊



國體抑外橫固圉強本鎮蹠銷妄將不存茲乎雖然公今日之行又有說焉我

國家承平百三十年于茲曩時重譯效貢邊徼夷於內壤時則巡撫所繫固非劇也自往歲來警報相續於道途加以兵鈍士疲久失弛張之宜則所繫校之昔不亦有輕重哉譬之治屋然椳闔居楔自非要地凡適用之材舉克以堪之至於薦隅棟幹之地勢峻位嚴非碩材巨節中堅膚理之器其患不免於撓抑故為匠氏者掄材

選良惟其堪然後用之於是君得以遂安處膽得以增  
美觀以今甘肅在前日則樓閣居榱之地也在今日則  
廉隅棟榦之地也為匠氏者掄材選良既已挈嚴重之  
任而授之公矣惟公蚤以名進士拜夏官尚書郎懿才  
卓行為六曹人望既參浙藩乃方伯吾省履歷無幾而  
褒詔九四及宏名偉譽增光前美然則西人遂安處之樂  
增瞻望之美於茲行不有見哉然忠又有祝焉昔韓魏  
公為陝西安撫經畧招討使一時軍中有西賊膽寒之

之譴及入相仁宗則澤被生人而功存社稷蓋德人君子在一方則一方蒙其功在朝廷則天下蒙其惠公行矣西事告成朝廷當以魏公故事起公於內公尚無愛西人之留使安處之樂瞻望之美當不徒專於一方而又在於天下也

冬夜小飲詩序

弘治己未仲冬二十六日涇川侍講伴來約予寺中遊予午枕方興聞其約欣然遂往馬仍各携酒饌借地於

常所往來僧無瑕隣僧白雲聞予二人亦來赴會仍命  
僮子載茶果以進酒將闌白雲呼基與涇川手賭三局  
予雖不能基從旁觀之意欣然亦自適也將歸涇川謂  
予不可無作以識一時之歡乃以冬夜小飲命題各賦  
詩一章仍自序之序曰我國家稽古建官分曹置務咸  
有事焉以責成惟翰林以文字爲職儲以禁密之嚴養  
以歲月之久不責以政務而期以近功秩清地重在昔  
人已有登瀛之擬故今官于是者藉是率得以陶情於

詩酒咏歌之間而勞逸不與他職事等其賜於

上者甚厚也雖然予嘗靜思以仰求今日之意而竊得

其一二蓋翰林乃儲養相業之地呻吟咕嗶非其職之

所先是故不以政務為責則所責不有出於政務之外

者乎不以近功為期則所期不有出於近功之外者乎

受厚賜於今日則厚自圖報不有冀於異日者乎此吾

徒今日在所當知而忽於是者或不知也今夫傭人受

直亦必知所以為償吾儕居是官不知其職是不明也

知其職不知求所以爲稱是不勇也嗚乎居人之位食人之食而乃以不明不勇自處焉觀今日儲養之意何如哉視傭人不虛以受直者何如哉詩成序此以自勗且以爲一二同志告焉

送許廷美赴大名推府序

少司徒靈寶許公季子廷美以進士拜命為大名府推于是君之仲兄亦舉進士在京師一時父子兄弟進則有同朝之榮退則有家庭之樂今且分郡符違左右別

遠京師於千里外不能無少歉然于懷者鄉先達諸公  
各賦言贈勉予復稱歐陽詹生事以告之夫詹韋布也  
所事者學業也自閩去京師奚翅千里也乃不以朝夕  
之養為愛而以樂親之志為樂君自視今日之行與詹  
何如哉時位足以立功名文章足以潤事業惠利足以  
周齊民自此而往駸駸然就於遠者大者蓋有卜于是  
行况司徒公清名峻行為朝鉅人海內士素所傾慕而  
天下素所仰賴於是以其功業鳴于朝廷之上君復以

家庭之訓鳴于郡國之遠使司徒公用時康世之心非徒止於親見而紹芳趾美復有人焉則其心之怡愉盖有窮天下之物不足以易其樂者其視躬晨昏修甘旨以不去其親爲樂者孰多而孰少較之詹徒以經生寒士之業以樂其親者又孰得而孰失哉又况今制進士居郡縣有異政者不三載擢補內職以君之才豈久居外郡則同朝之榮家庭之樂行當復有見矣歟然之懷胡爲感于中哉或又謂大名民俗剛武尚氣力而推



復以刑獄為專職讞鞠之政叢積堂下君是行不有勞  
于煩劇乎予復告之曰昔先王以禮讓治天下自後世  
禮不足而後刑獄之政始繁是刑與禮其先後緩急之  
序固有在也君家世以二戴之業專門其於三千三百  
之學講之已熟出其餘以施之政則禮教可興刑措可  
幾而先王之治幾復覩矣何劇之不可治何煩之有勞  
哉贈詩自鈞陽大司馬公以下凡若干章予小子辭命  
不獲僭先首簡

應天府鄉試錄序

皇上踐祚之十有四年秋天下復當選士之期應天府臣  
循故事以考試官請

上命臣忠輟講直柄其事事竣錄成臣當有言序諸簡末  
竊念臣少嘗從先臣遊茲土見山川盤踞之雄城闕都  
邑之美曰地靈如此不有豪傑俊乂之士起而鍾其靈  
以當其盛者乎乃晉而求其人與之游時以勢位寡弱  
延攬未廣其所見才百十之一二耳既而叨甲科官侍

從隔越南北者殆今二紀于茲然懷賢覽勝之念發於  
馳想而感諸憂昧者往往乎有在今幸以職事承

天子明命而來遡龍江循石城入踐都邑之境其山川

風物恍若過里門瞻桑梓而歡悰喜意油然而不能以自

已及進而治考事焉其卷帙之浩繁論議之宏博才氣

之英發辭藻之美觀手披目覽應接不暇至有使人神

竦氣奪而不能以自逸昔之所謂求而不得者一旦坐

收其言論於几案之前於是作而嘆曰南都人才其盛

固如此哉昔人謂地靈人傑孰謂其言有不足信哉第  
爲制額所檢不能兼收博采以盡一時之才麟鳳網  
羅不能無遺憾焉雖然古稱建業爲東南都會在昔如  
六朝如南唐非不都于此也而夷考其作士之功萬有  
不逮今日者蓋其土裂政靡三光五嶽之氣不完而  
其君之德又不足以當其地之盛故靈淑之氣亦重惜  
固秘而莫肯爲之用洪惟我

太祖高皇帝 龍興淮服奄九有而君之

列聖相承以及

今上道德仁義之化積於世者日益深地氣之靈者蓄亦厚鍾之於物且有瓊奇可愛況於人也不有為豪為傑為俊乂之才者哉夫人之才以地氣而盛地之氣以

王化而盛則爾諸士今日成盛世之令名膺賢科之峻薦其出於

上之賜也固較然矣烏可不感激奮發而圖所以報稱哉若被其賜不知所感知所感又不求所以為報豪傑俊

又之士固不如是也蓋相與勉之者今臣之來也叨職  
事之榮得以續江山之舊觀懷賢之風願亦皆  
上之所賜也臣於是侈言之亦所以揚休命者  
恩賜而輸報忱耳

送少司寇沈公休致歸杭序

正德己巳夏四月南京刑部右侍郎沈公文進上疏乞  
休致

上念公中外勤勞甚久特允之于是南都公卿出餞都

門外石城佛舍而以別言濫屬于予予聞昔韓昌黎送楊少尹之歸首以二疏知止足爲樂中以中世士大夫罷則無所于歸爲戒末復模擬其某丘之樂以致健美之意而於其幼學壯行之事略無一辭以及豈不以士大夫壯而得行其道者未足爲難老而知止足能歸者爲難乎又豈不以歸而迹有所託心有所樂者爲尤難乎今公有進士起家敷歷中外四十餘年其功業譽望赫然在人耳目然以久在名場于事間有齟齬其

欲歸一念戚戚于中者屢屢矣今一聞

命卽日出公寓僑居于雞山僧舍以俟上吉而行略無  
留戀顧惜之意形諸顏面是豈固知止足而不能歸者  
耶公上世嘗以貲雄兩浙逮今甲第之雄林亭之盛內  
可以奉起居外可以延賞適而又有腴田廣廩以供賓  
祭蔬果魚肉以羞晨昏舟輦僕從以奉出入是豈以官  
爲家而罷則無所于歸者耶杭之山水形勝甲天下而  
西湖形勝又甲于杭凡高人逸士固所樂聞而願遊者



公茲歸也春熙景明輕舟短楫溯洄于烟雲杳藹之間  
容與于鷗鳥忘機之地或訪逋仙之宅以崇其高尚或  
登蘇公之隄以追其風流或吊武穆之祠以慰其忠烈  
舉酒酹波揮毫染翰而懷賢吊古之思憤世嫉邪之志  
每激發于浩歌舒瀉于長嘯其所謂樂蓋天下之樂也  
豈一丘一水云哉繼二疏止足之榮遺中世士大夫無  
所于歸之戒具高人逸士所樂聞願遊之樂使昌黎公  
聞之其爲公健美又當何如哉予頻老且多病頃亦嘗

具疏謀引去不果其一水一丘雖無形勝如公而鄉井  
之懷則同也不能自樂而樂人之樂不能爲人所羨而  
徒美于人豈惟有愧于疏有愧于公而視昌黎之言不  
亦有愧哉詩若干首其意多出此予不佞僭序于首以

會試錄序

皇上嗣登寶位之六載是為正德辛未舉會試之典一又  
再矣及是試期伊邇適臣忠以病在告累疏請謝政

上既賜旨諭留即日復命臣暨學士臣貴為考試官其  
同考試則侍講臣一鵬等監試則御史臣某凡諸執事  
亦皆慎束以往舊制同考合五經分房為十四人近以  
易詩書卷浩繁各增官一試院廨宇少加增創試事條  
格少加增置綜理防範視往歲加詳密凡此皆禮部尚  
書臣宏先事具請而奉行者也會試士以期集者合新  
舊三千五百有奇所取僅三百五十亦宏等臨事具請  
而臣等所遵行者也至於精白公慎務期得真不少謬

以人事君之意此則臣等之責亦臣等之心以求無負  
於明命而愧厥職者也錄成將以陛見之日上  
獻臣當有言序諸直竊念臣往歲承乏南省嘗於職事之  
餘恭訪我

聖祖興王之迹允江山偉觀都邑勝跡時出一登覽之而  
見所謂禮賢館者詢諸父老則曰此

聖祖甫入建康首徵青田劉基輩與之論經史詢治道為  
之建設以居者也臣乃仰而嘆曰卓哉

帝王之見方渡江之初顧何時哉即以崇儒右文談經訪治為首政而斯文一脉不絕如綫者賴之以復續所以正士習敦民風以縣億萬載文明之治其非於是乎有在是即求懿德肆時夏之心而所謂按戈講藝又有不足言者矣

列聖紹述以及今日百四十年餘于茲仰承 佑啓循用彌篤自國都以及里巷一皆有學自句讀以及講授一皆有師自日試月程以及歲校一皆有規而士以縫掖

遊庠校有不談王道者雖市人亦得過而笑之肆今士  
挾藝而來者雖風簷斗牀之下略見展布而英銳之詞  
昌大之氣高邁之識使人為之駭心眩目而健美不置  
文之盛其有徵於今日者固如是哉頃者

皇上大奮乾斷討僭叛鋤姦萌正糾繆釐訛之令一時紀  
綱法度士習民風煥然一出於新不啻雲漢日星障翳  
於重陰久曠之餘一旦披露扶裂而萬類得於仰瞻者  
欣欣然舉有生氣自非有文為之經緯何以及此則我

聖祖崇儒之澤

列聖及

皇上用文之效不於是益有徵哉文之盛誠至矣雖然臣於是又不能無懼焉蓋質本也文末也文盛質衰而不知以道損益以即乎中則其流也爲浮靡之習華藻之飾而所言所行皆爲無本而不足觀矣以是形諸民風爲偷薄爲陵踰形諸士習爲諛佞爲儉邪形諸政議爲頗僻爲瑣屑將使天下國家于何所賴焉文之盛而至

於不足為世賴則何以文為哉我

國家右文及今日以文取士之意果如是哉忠與爾諸  
生皆以文進者盍相與求其本而護之



少傅野亭劉公

臺卷之三

終

少傅野亭劉公遺藁卷之四

碑志祭文

太子少保吏部尚書贈太子太保許公墓志銘

資德大夫正治上卿

太子少保吏部尚書許公以疾卒于家計聞京師朝之大  
夫士無大小咸曰公一代偉人也方將冀其復用以終  
天下之望而乃遽至於不可起矣可惜可惜未幾其子  
誥持禮部侍郎李希賢狀來請銘予辭之不得乃叙其

事而銘之公諱進字季升號東崖姓許氏河南靈寶人  
系出周文叔至隋楚州刺史法光生唐譙國公紹紹生  
國師爲左相國師生力士洛州長史力士生欽寂欽寂  
生輔乾海東慰勞使輔乾生昭戶部尚書昭生經同州  
刺史因家同州經生克一克一生田田生承宣宋給事  
中承宣生待用國子博士待用生巨圭舉進士巨圭生  
宗都官員外郎宗生才舉進士贈少傅才生簡端明殿  
學士簡生東遷長安東生祥祥生佐金大定中進士佐

生炳管軍千戶炳生威兵馬都元帥因西征過靈寶愛  
其風土遂居焉威生本本生玉俱百戶玉生五五生九  
九娶何氏生仕信仕信娶陳氏生實實娶蕉氏生聚爲  
安定教諭即公之考也娶何氏公十歲安定授以禮經  
即能通大義天順壬午領鄉薦成化丙戌舉進士授監  
察御史按甘肅山東俱克樹風裁時中官汪直妄殺建  
州夷以冒功御史強珣劾之直誣奏珣逮入獄公具疏  
劾直人多危之已而得

旨珎謫戍遼左公得奪俸又劾奏直黨且發直鍛鍊之獄  
憲廟是之遂禁緝事官校直怒欲中公無所得乃摘公章  
疏中訛字奏之杖於朝幾殆壬寅擢山東按察副使嘗  
監臨鄉試同事者欲私一貴介公堅不可乃止東昌一  
武弁子懷金與所厚生飲于酒家暮散武弁子被殺有  
司執生於官不勝拷掠即誣服公知其冤且意此必酒  
家也又意其人得金必易貨乃通召邑商人閱其私曆  
見酒家以殺之次三日易布數疋一鞫即服焉弘治戊

申遷廣西按察使未幾擢右僉都御史巡撫大同督理  
軍務屢條陳邊事多從之武邑王聰沐瓖縱不檢公奏  
黜爲庶人又嘗劾中官石岩貪暴岩誣奏公擅用旗幟  
遂謫知充州府甲寅遷陝西按察使時北虜大寇甘涼  
仍命公爲左僉都御史巡撫甘肅議處得旨屢有斬獲  
哈密與吐魯番構隙其酋牙蘭遂惠順王陝巴而據其  
城池爲患幾二十年公乃統軍至肅州命總兵官出嘉  
峪關調赤斤罕東等處兵爲聲援赤斤等素感公之恩

樂為之用遂直抵哈密克復故城城破之日城中人為  
牙蘭脅從者餘八百人聞兵至懼誅登高臺不下公開  
諭之始下當時有欲屠之以圖功者公不從卒得全活  
丙辰遷右副都御史巡撫陝西丁巳

召為戶部右侍郎賜誥進階通議大夫贈祖考妣考妣配  
張氏繼高氏俱如例復蔭一子為國子生刑部主事鄭  
嶽無罪下獄公為疏雪之彗星見公與周司徒合詞言  
宜加修省黜用舍省靡費等數事與申北虜寇大同

上命以本官兼左僉都御史提督宣大諸軍事法令嚴峻  
不避權右賞劾一將官不奉法不便者多巧構之遂令  
致仕既歸築東崖精舍日徜徉其中若無意於世者而  
廷臣論薦凡四十餘疏弘治乙丑起爲兵部左侍郎提  
督京營兵馬尋進尚書賜蟒衣公感恩遇上疏勸上勤  
學問戒遊逸上嘉納之每操練軍旅必指授方略各  
邊事亦處置周悉凡權貴請托者多不行未幾改吏部  
尚書賜玉帶加太子少保階資德大夫正治上卿賊瑾



專政與公不協乃誣以他事致仕去之日朝士咸加嘆惜甚至有垂泣者久之又令冠帶閑住庚午八月十八日卒于正寢享年七十有四卒之時聞空中有聲如雷先數日有流火入宅蓋不偶也瑾敗

朝廷用言者復令官賜祭塋贈太子太保子男八曰詔張出舉人早卒曰誥給事中改檢討出爲金州判官曰讚御史改編修出爲臨淄知縣曰記曰詩邑庠生曰詞曰論俱高出曰誌側室翟出女三一適浙江按察司僉事

楊惟康一適生員普曰利一適國子生趙忞孫男七曰  
儒舉人曰佺曰備曰佩曰爾曰偕曰位孫女二公資幹  
魁梧器宇偉岸見者不能不爲之起敬早歲肆力於經  
史作詩文春容典雅性至孝嘗承安定公庭訓撻指破  
後每舉指輒感泣不已事二兄敬愛兼至家素饒裕而  
自奉儉約歷官垂四十年冰蘄之操始終如一日晚年  
退而不用用而未究人以爲歉然祿位名壽兼備子孫  
蕃衍科第不乏天之所以報公者未有艾也所著有東

崖集憲臺奏議平番始末諸作正德辛未十月十一日  
葬于城南之一里石嘴山北麓先是公有五世祖以上  
譜牒落莫無可考偶一日於塋域隙地得一石倚載于  
上或神相公之德而不欲泯沒其先世之幽潛故爲出  
此以昭異之耶銘曰

於維我公維國元老維文維哲星躔于昊維正維真蕩  
蕩周道公在邊陲西北用保勇始強禦鬼蜮爰掃孽讎  
幽隱煥寃以潔名流區宇氣凌峰嶸公生蒿洛地不愛

寶公隨物化乘箕天表石山之巖寔維公兆健氣鬱鬱  
山水環抱塋茲後昆訥世是紹

鉅野恭定王孝行碑奉勅撰

王諱陽發謚恭定魯荒王之曾孫鉅野僖順王之子今  
鎮國將軍當渝之父也王生有至性在襁褓時卽失所  
恃繼母妃李氏鍾愛之保護鞠育無異已出比長以母  
妃蔡姦逝不及奉事一盡禮爲恨其事僖順及妃李其  
孝謹凡養志承顏情禮備至每晨興必具衣冠詣寢門

外候起居暮亦如之雖隆寒盛暑未或少替李臥病乃率群弟處寢第之別室衣不解帶者逾月至夜復稽首北辰下祈以身代每湯藥必親嘗而後進上醫禱神帛悴心力及終則躡踊號慟毀幾滅性而含歛祭葬一惟古禮是循其處同氣尤極友愛自少及老宮庭內外無間言弘治某年月日以疾卒時年七十有一配妃孔氏先聖五十八代孫知縣公瑾之女賢淑孝敬配德無忝恭定在位凡五十餘年而奉藩守身之謹藉其內助之

功寔多後恭定數歲卒合葬於宛城東岡頭之原先是  
恭定恐身後以葬事瀆朝廷且勞費財力乃卜地於城  
東岡頭自治墳壙一區旣沒其弟鎮國將軍陽錦輩暨  
府中子姓具啓魯王上其行于朝欲自撰德行碑樹墓  
道而且以碑名請 孝宗皇帝嘉允之賜名旌孝至是  
當渝又恐其親之德久而或泯也欲令詞臣一言垂光  
永遠且以為諸宗室勸於是魯王復以為請 上特允  
焉竊惟樹藩所以屏翰王室而孝乃風化之原自行之

先也今恭定以 皇明懿親分藩於東禮人望之國而  
能躬履至行終始不爽如此則其徽音遺美誠足以式  
宗藩厚主化翊贊我 皇明孝理之治於億萬載所謂  
屏翰之功顧不偉哉視 先朝旌孝之名不益有光哉  
書于石豈直為一藩一方之榮而已哉仍繫以銘銘曰

於皇

烈祖仁有萬方振振族姓藩屏承將惟王聖裔鉅野分邦  
德董闕里慶衍天潢夙稟至性率履恭肅一念純孝寧

格窮蒼忠勤友誼積日彌章而家而國孝子賢王允矣  
良翰世教以匡翊我

皇祚億萬無疆名碑旌孝先朝表揚載逢

今日錫祉益昌詔下詞苑俾識厥臧爾頭之原衣被寵  
光東蒙蠶室滄水茫茫猗惟令譽式與之長

唐王元妃墓道碑文

大明唐府唐王元妃既葬之踰年其儀賓莊僑輩悼念  
妃之懿行雖藏之王牋列之國史而墓隧之石未樹恐



無以式宗藩詔來世乃列狀請於王遣使命走林下以  
言見屬患時以病老辭三四不獲命敬再拜受而序之  
妃姓蘇氏唐宰相味道之裔孫唐府先莊王之冢婦今  
唐王之元妃也妃生有至性及長嗜書史教以孝經內  
則及列女傳輒能領悟其肯綮成化戊戌今唐王尚居  
潁昌藩邸憲宗皇帝命選妃入潁昌邸明年遣文武  
重臣持封節寶冊封爲潁昌王妃乙巳復遣重臣進封  
爲世子妃弘治己酉孝宗皇帝遣重臣進封爲親王

妃在位三十五年以疾卒計開 今上皇帝 太皇太  
后 皇太后 中宮 公主咸加哀悼仍遣官賜祭  
葬一如制 皇眷天休哀榮備至顯封尊位始終膺盛  
如此是豈居然無謂而偶爾以致哉蓋其孝恭之節動  
約之操出自天錫秉諸坤靈而孚之神理者素有其地  
耳妃甫被選入宮適先莊王先太妃俱在位妃順志承  
顏內外盡禮每晨興必肅容盛服問安寢門外允服御  
簪飲雖至細皆出於親理左右無方務得其歡心而後

已及居先王先太妃喪哀毀過中幾至不支朝夕祭奠  
相王行之悉如禮感悼哀慕至老不替春秋有事宗廟  
凡饗洗豆登必躬自滌潔左右恐其勞欲代之者曰此  
吾職也以微勞簡大禮於心其奚安以王適位久虛恒  
言此宗廟蒸嘗之主藩垣磐石之託胡可不蚤為之計  
乃祈神詢卜朝夕切慮其姬嬪有居側室者保護訓教  
一如古胎教法又選女之宜男者進王所以俟百則之  
祥玉有大政及疑獄問一詢及則悉心恭對辯析了了

因事或亦進諫王弗納頃之從容必再言冀其聽納以  
爲令德令聞之助其孝恭之德如此天性樂施與勤女  
紅積歲成布縷若干皆頒賜內貴及文僚輩諸王宗室  
待之皆以恩禮其有以昏喪來請者必厚加贈賻以相  
其成外戚昆季恒以禮法戒約無得陵踰橫矣以干  
國紀乖王意暇則坐玉華閣課二郡主及諸宮姬以書  
史使其知古今賢否善惡以克其富貴之習至其自奉  
自大朝輦翟外被服惟布帛錦綺羅紈鮮以進御其勤

約之德如此他如新武侯祠以表忠貞建河梁以便病  
涉出續衣給糜粥以濟寒餒儲善藥命醫主市肆以活  
疾疫或歲歉請王大發廩以拯溝壑其孝恭勤約之德  
足於內治而推諸外政者又如此妃生於天順壬午三  
月初九日卒於正德壬申三月二十六日享壽五十有  
一生子一蚤卒女一封蓬萊郡主通經義詩律配儀賓  
莊雋先卒庶女二封壽陽郡主張氏出能講孝經作小  
楷配儀賓馬文漢亦先卒一莊氏出在宮未封正德癸

酉十一月二十六日雋革奉妃柩葬紫山之原嗚呼三代而下葛覃卷耳之風既往女史之誠漸廢雖閭閻士女亦多奪於富貴之習矧其在上耶今元妃位尊榮之地而盛德懿行修舉無遺憾方諸古哲媛可以匹休儼美於無忝所以宣王猷篤愛厚禪我國家千萬載德教之美而有光寶玉展親之意不亦厚哉今王以懿親建大邦於中土闕宣間惠式寧屏藩其禮賢右文之譽流行中外雖天潢元德出自性成則元妃克相之功亦

豈可誣哉

愚庵李公墓表

華陽王府教授李公既卒之數年其子克嗣以副都御史奉

命巡撫河南間走書林下諭子曰先公負才藝位既不能

滿其德又不獲寵封以及其身此人子終天之恨也

願得一言銘諸墓道庶存沒或有可慰者予與克嗣在館閣有雅契乃受書而序之公諱安吉字邦瑞別號愚

庵以儒學生起家升上庠授吳嘉定司訓一時造就戒  
立多有登巍科躋顯宦者嘉定秩滿擢華陽王府教授  
時王與諸將軍不相能又與元妃有小嫌公進而與王  
及諸將軍言處骨肉之間當以恩處貴富之極當以禮  
退而于王陳倫疊誦

祖訓以冀其自悟既而王與將軍皆抵法乃是公言而悔  
前日之不從王之忿志亦潛消默化而妃竟得以安其  
位自是府中事無小大必獲公一言乃決王之禮貌聽



納亦有加無替未幾王屬疾嗣王呱呱尚在室一時人心罔知底定公左右輔翼克竭心膂府事甚有賴焉嗣王既嗣爵公亦駸駸向老乃再三陳請乞歸府中自主而下挽留之皆不可王躬餞郊外至輿垂泣而別歸二載以疾卒葬邑西應龍岡之原時年八十有二弘治壬戌九月三十日也公之先出江西吉水四徙而至內江梧溪遂家焉祖諱觀以子蕃貴封兵科給事中蕃即公之父也永樂中以鄉薦授遼中府司訓應詔上定本

十六策徵拜兵科給事中尋晉左卒公生而凝重雅厚  
平生不妄交與不苟取受宦輒所至率冷席自教惟講  
榻之外無長物一經一史恒于于然及歸乃携朋舊觴  
味於山水名勝之間一時之樂雖未即起商皓招睢老  
五六之尚真青城峨嵋之間有隱君子者出而從之遊  
以脫袞塵埃之表綸封誥肯遲為泉石之寵賁而詎  
意九原已不可作矣公配田氏子一嘉嗣先卒女一適  
生員俞獻繼田氏子二長振嗣次即克嗣女一適生員

吳亮采孫四檯棠槃松公所作有愚庵稿藏于家先是  
公在華陽時嘗遣振嗣充嗣入京師從名公遊業成振  
嗣用華陽薦以冠帶儒士居府邸嗣公輔導之業充嗣  
舉進士入翰林為庶吉士清才雅器館閣諸老愛重之  
尋授刑部主事坐累謫岳州府通判才猷操履益見重  
於當道嘗勘九溪夷情不撓法其酋長陰遣人至公廬  
舍欲假回祿之害以泄其私忿忽見一巨人擁絳袍立  
左右遣者驚走後酋長在囹圄告人曰李岳州有神人

擁護後必當大貴我不言人固不知也又一屬吏坐法  
當糾治乃懷百金謁公求援公拒之曰汝豈不知吾兒  
素以清白稱今乃以暮夜金來汙耶其人愧走充嗣曾  
是聲益振擢知隨州再擢僉事憲使京兆尹以及今官  
所至首以扶教化植善良為先務其他摧抑豪穢黜  
貪黷盜風義駢屹然一時名臣廟堂大拜當即日有見  
若公家學所被德澤所及也予嘗聞昔人言士君子得  
其時則功成事立大位及于身無其時則卷道藏器餘

澤發于後自公觀之則其言豈不益可信哉乃銘曰

昔在柱下李稱著姓奕奕梧溪簪紱相映大策十六諫

墨盈紙謀國名家不刊青史公升上庠與曾子齒振

鐸東吳莪莪髦士入相華陽且臣且師洛陽少年多才

非時曳裾吹竽實非素好宦海無涯孰非畏道乃振我

衣乃彈我冠青城峨嵋還我舊觀梧山與梧溪瀾瀾

起能歌之侶巢洗耳有子名臣奚翅楚寶三代之茹萬

夫之表詔黃鵠再褒典有待況彼江源禹道將太豈

謂幾境中植槐柯蘧蘧胥化當奈公何崇岡應龍上司  
霖雨藉公餘澤大霈寰宇有堂若封有喬若木神祉坤  
靈永昌似續

自撰墓誌銘

野亭字司直別號野亭其世系姓氏里族載於先少傳  
公銘誌中茲不具野亭年二十三舉河南成化甲午鄉  
薦二十舉進士改翰林庶吉士除編修纂修憲廟  
實錄成陞侍講九載陞侍讀學士乙丑今上即位以

春宮講讀恩陞學士明年陞南京禮部左侍郎未旬日陞本部尚書丁卯轉南京吏部尚書尋被召改吏部尚書兼翰林院學士掌詹事府事入內閣專掌誥勅是年秋九月仍以尚書兼文淵閣大學士叅預機政尋晉少傅兼太子太傅武英殿大學士尚書如故十月以病老具疏請休退未允自是疏七八上皆荷

溫旨勉留辛未春省墓歸未幾再求休退乃

俞允仍賜勅并月給米五石歲撥輿夫八名廕子元嗣為

中書舍人時年六十也歸之日有先公敝屋數楹城之  
南有別墅一區田百畝桑棗榆柳百餘株繼又於居舍  
後鑿小池放一舟其中每當春暖秋晴病起意適之時  
或駕輿登野或張席命舟徜徉自放於水雲林月之際  
其所獲一賜餘則歲分十之三四以頒諸流離貧餓者  
間嘗進元嗣論之曰吾老且病沒之日勿請葬祭謚  
贈勿干名筆為諱文詩輓有一如是吾不汝子矣文成  
或者乃曰公筮仕幾四十年所歷非一官各有所職今



何為而不書者蓋予雖以文翰著銜其所職則啓沃輔翼有關於上下者頗重大予如是無一能效焉書之徒以自貽愧也公孤窮階而居之若不能一日安者蓋予性峭直狷介既無功業以爲將圖之資又乏低昂以爲植立之地不即去則罪日大愧日集士夫清議并以先所有者而奪之矣其歸而居家雖杜門謝客然猶有車馬遊從之樂有貧餓周恤之惠若未能絕意於世者蓋遊從之樂所以章君上之賜周恤之惠所以侈

君上之恩外此則非所知焉其不敢有 卹典文誅之請  
者蓋無實德而尚虛名此予平日所深耻者今若是使  
予昭昭累士夫之餘議冥冥為地下之愧魄矣尚幸有  
不死可持之以見先祖考於九泉者自揣平生無大過  
尤此心無少負焉耳今附諸石者俾來世子孫皆當嘆  
於不負以副其所無負者野亭配王氏同邑知縣覽女  
貞順柔則內範嚴整於女紅之事尤精巧初封孀人夫  
人金晉封一品夫人生景泰甲戌八月二十六日今年

六十五庶黃氏生女二長王山適醫官姚鉅次黃山適  
生員尹郊俱蚤寡子一即元嗣亦黃山孫男文孫女恩  
孫梅孫俱幼野亭生景泰壬申八月十五日誌成於正  
德戊寅九月十五日時年六十有七也沒之日久近未  
可卜元嗣續當鏡諸銘詞之末銘曰

嗚呼野亭胡為而生胡為而仕胡為而歸胡為而死蓋  
其生也窮天地之委和其仕也濫

皇明之介社考諸已考諸人則歸有餘裕委者還濫者收

則死獲所止嗚呼世有為野亭嗤者曰如斯如斯后有  
為野亭嗤者曰乃爾乃爾

祭曾學士美文

維弘治十六年歲次癸亥某月日南京翰林院侍讀學  
士曾先生士美既沒之逾年其同年暨寮友之厚者始  
克陳詞致賻醢酒寄奠于墓下而咎之曰嗚呼惟昔我  
憲廟先帝御馭之十有四年也寔惟戊戌之春聖衣雖久  
延訪彌諄嘗集于太夫於軒墀以恭承嘉問首稱忠賢

文之異尚以布諸策詢蓋欲挽三代之淳懿用以新治  
世而惠斯民于時公以逾艾之齒久晦之迹乃明目張  
膽昌言大對褒然起而為第一人龍頭擅老成之譽後  
士喜學術之醇命司袞鉞服列史臣年勞夙著器業日  
新進秩幾讀暫輟懸坡之直請符南署往問龍江之津  
蓋南都得公則文章足以華根本之重地公得南都則  
江山足以豁懷抱之久湮詞林舊侶過逢日頻適我  
憲考鼎成上賓周南留滯隨詔而起先朝功德有錄必真

載進翰長寵被絲綸服新恩以歸舊地握院章而園綏  
銀年浸齒髮思入鱸葦訪某水某丘于童子遊釣之地  
寄一觴一詠于故鄉烟水之濱使者式廬因方事于考  
德賢人在泥胡遽托於夢辰某等聞訃始而駭中而疑  
固以為傳者之誤終而詢諸其鄉人也乃以為信而知  
其摧疾之因江山在望滄海橫巾嗚呼鶴公之疾既簡  
于書使以走問執公之紼又制于守官而莫親生有遺  
孤邈千里隔于慰問沒有真賻至逾歲始一克伸臨事

嘆義舉之晚捫心愧友于之倫茲者託便風于仙里被  
宿草于郊垤緘詞致酹聊用告陳公其有知耶無知耶  
來歆耶不來歆耶斯固不可得而見亦不可得而聞而  
吾儕所以致區區意者蓋聊以寄哀感于永訣申舊誼  
于斯文尚享

焚黃祭曾祖考妣文

惟曾祖考系出故侯勝國運未昉遷于留舍光匿曜終  
老林丘深仁厚澤河廣川流垂及不肖庸末寡儔重惟

世業黽勉于脩濫通朝籍歲月云邁無功致澤惟深愧  
尤頃承恩數頒自宸旒龍章纘誥四世兼收敷階  
名秩雅重清優惟曾祖妣懿德匹休一品位號百世千  
秋神之相佑天之報酬遺德有在而豈無由不肖何功  
仰藉貽謀茲奉

上命展掃松楸 綸言昭布用慰潛幽尚享

焚黃祭祖考妣文

猗與我祖載光隱德益濬慶源衍茲流澤生我先君及



我叔伯督以耕商誨以儒業閎閎衣冠漸生光赫及于  
不肖材性闇劣匡翼無術濫隨班列頃承 詔命推恩  
貽厥初進冢卿再登柱國祖妣聯輝並沾優渥一品冠  
裳永光幽宅遺德不爽神相罔忒不肖何能徒增慚色  
幸茲得告恭掃阡陌

天語丁寧尚希昭格尚享

焚黃祭父母文

嗚呼惟我先君負明特之才而不干譽于時抱匡翼之

術而未顯名于位教外庠抱鉛槧以窮年佐冒學其鑿  
塩以終歲惟道之所存雖百千事變以無渝故志之所  
向終四十餘年而益銳遺有餘不盡之多福為方與未  
艾之家惠不肖以寡學而負

上恩以自欺而負庭誨于朝負濫竽之譏于家懷授簡之  
愧惟陽施與陰報之相符故神休與天祉而適會

詔勅再三 恩波汪濊承學士之褒再進冢鄉之貴光  
祿柱國既崇重于動階學士殿銜復駢繁於稱謂惟我

先妣淑德名配三錫同

王命之榮一品擅閨秀之最鸞書什錫於琅函龍光下賁  
于幽隧遺德與月弦而日升餘澤共川渟而困漚敢言  
不肖之功益增內出之愧茲者展敬墓田薄陳牲祭  
綸音再拜以對揚泉室並期于歡慰嗚呼龍光昭回草木  
增蒼仰戴

皇恩寔出先庇釀酒陳牲薄申告祭尚享

清明祭掃祖塋文

忠竊名仕版苟全始終仰戴

天恩寵及進退博士府君而上至曾祖進柱國之勲階孝  
孫元嗣下及存恩叨中食之 寵錄四代咸躋於一品  
奕世趾美于一時榮被松楸光增閭閻硯惟薄劣無任  
恐惶蓋先德默相于幽潛幸不肖昭受于貽厥乾始坤  
厚廣大難名寸草春暉報酬無地茲者滄生醞醕敬掃  
墓田春日載陽群從咸集協恭相事少伸謝誠再惟我  
本宗伯叔兄弟及中外宗親共鑒下懷惠然歆格尚享

亡兒朋玉祔塋祭文

維年月日亡兒朋玉將以次月二日祔塋於先塋之隅  
左其父司直暨其母王氏等乃憑棺致奠哭以送之而  
且告曰嗚呼吾生孤立中歲生尔尔生警敏頗解文史  
世業書香望爾繼趾豈謂偏年遽已於此既還爾柩獲  
歸桑梓暴露書齋兩更年矢父子母妻客天千里苦雨  
淒風寒廬塵几傷爾魂孤將誰憑倚吾身興思痛心無  
已嗚呼吾以不德既不能庇爾之生貪榮于朝又不即

送爾之死情理乖舛獨負顏恥茲者予告來歸襄事在  
邇啓竊先塋祔塋祖妣迤邐良震實惟厥址遷爾仁室  
同安所止用集親姻饗爾牢豕呼爾不應食爾不起爾  
容在壁莫忍觀視隱痛填胸肝腸崩弛嗚呼喪予之憂  
人或有矣惟吾有憂誰他可擬骨肉無援而父母早傷  
於背棄公私多違而衰老倏先於年齒爾弟孱弱未即  
于成立爾母垂老永傷於失子吾有此情則抱恨中曲  
而每以禍福疑於鬼神爾聞吾言當含哀重泉而罔以

幽明分於彼此嗚呼哀哉

自作祭文

維年月日孤子劉元嗣孫劉存恩洎家衆等恭具牲酒  
蔬果菲儀奠告于先公野亭公之靈曰嗚呼哀哉凡我  
家衆不聆先公之訓不覩先公之容奄忽七日矣寸心  
苦痛五內摧崩嗚呼哀哉奈何奈何仰惟先公剛方嚴  
毅儉朴清公抱匡國之術而未久於位負陳善之敬而  
未竟厥衷思翼雲龍之矯矯耻同窟鼠之營營章十三

上未老歸耕豪逸時發于歌嘯激烈徒鬱于中誠一丘  
一壚舊業殘經先公所以自然有艾於徒老而造物者  
不能一爲之主盟先公嘗揭上帝臨女無貳爾心八大  
字日嚴於對越梓勒作好人存好心行好事三格言昭  
示於後生未嘗以巖巖而剝人利已未嘗以冥冥而悖  
道害公百年所有者惟富惟貴惟壽終身所保者曰勤  
曰慎曰清譽望自近以及遠士論不約而自同有頌上  
謁於祖考無愧以瀆於神明先公所以自慰自怡而尚



論者得據之以公品評第佳不肖罔克仰承不能踵雲  
霄之高步襲詩禮之芳馨棲身畝畝拙守門庭敢不歛  
約情性繕治厥躬冀為鄉邦之良士少答遺訓之丁寧  
更嚴孫訓務續簪纓一以贖不肖失學之罪一以慰貽  
厥裕後之悰先公今日雖沒未沒不在猶在而為子孫  
者或無忝於英靈明歸真宅輒駕徂征骨肉決絕血泪  
縱橫嗚呼哀哉尚饗

少傅野亭劉公遺藁卷之四終